

思

軒

文

集

思軒文集卷之十八

墓誌銘

太子少保南京吏部尚書謚康懿陳公墓誌銘

弘治元年二月二十九日太子少保南京吏部尚書致仕莆田陳公以疾終于家計聞命加恤典又命舉壹惠之制於是諭祭以文營葬以式具如故事而以康懿易名又允合經禮

上念公

先朝舊臣所以軫不慙之悲而施寵終之恩如此吁可謂盛矣公葬有日其家以公治命來請予銘予感公知

已不能辭乃按其鄉人工部侍郎劉公璋狀而銘之曰  
公諱俊字時英別號愚菴自幼聰警不凡長遊郡橫治  
書經正統丁卯試鄉闈以閩藩第一人發解明年中進  
士第授戶部主事累遷員外郎郎中成化乙酉陞南京  
太常少卿戊子召為戶部右侍郎癸巳改吏部乙未陞  
左侍郎丁酉滿九載拜南京戶部尚書庚子奉勅改  
兵部叅贊機務甲辰轉吏部丙午尚書九載滿赴闕  
上嘉勞之賜以羊酒寶鈔俾還任無何疾作抗疏乞休  
遂加太子少保致仕 賜璽書馳傳還鄉仍命有司月  
給廩粟二斛歲供輿糒四人蓋歸既逾年而疾甚以至

不起公為人負才礪志自為主事已綽有賢聲嘗督天津諸衛官兵採秋青草即日奏減歲增之數三十五萬束令止輸原額蘇松諸郡折糧銀為里豪所侵者七十五萬兩有奇公往徵之不數月悉輸內帑尚書金公濂大咨異之自是更景泰以至天順其所任職皆嚴辦而賢能之聲日益有聞辛巳朝廷出師征兩廣叛寇命公往督饋餉時郡邑殘破公私匱乏百方籌畫事克有濟大率如弛鹽商越境之禁俾得隨處貿易而引輸粟二斗于南雄梧州用是兵不乏食而民不出賦輿論稱之是冬母喪乞守制不許明年師還始歸莆又明年復

任未幾而有太常之命先是為少卿者多不檢一祠官  
缺請託紛然公至僉舉以公遂怙怙服蓋其為務甚簡  
而公任之常不勞餘力識者固已知非公久處之地矣  
閱歲再暮遂入朝為戶部尚書揚公鼎以剛訐自任不  
假貸於僚佐然獨重公事經公斷制者即不復省屬時  
四方奏災異三邊告輸輓文移還集諮議旁午裁決如  
流不淹晷刻而靡不曲當人咸服公為不可及辛卯京  
師饑公奉 勅發太倉粟一百萬斛減價糶以利民權  
貴有乘時射利者公請於

上凡糶以升斗計滿一石者閉不與其計遂沮而饑者

獲濟壬辰

上命將北征特勅公總督軍餉于秦晉諸邊公倍道疾馳比至則邊庾空竭歲且不登芻粟價湧而榆林延綏糧道險遠輸者病之公乃發金于內郡市易且修西安韓城同官徑道以便飛輓是行所向無敵虜酋授首公勞伐居多凱旋加俸一階尋遷吏部銓綜人物號為清允比陟南臺荐更留府剷除宿弊蓋不動聲色而事皆就緒不假威嚴而人自懾服名德老成

上方倚毗而公乃引疾決去秩增官保而祿之終身豈偶然哉公嘗以文學聘考庚辰會試己丑南郊命公獻

北海神壇冊封 藩王持節充正使之荆府他凡大祭祀大燕享公無不與而

上寵異之頒賜絲幣書籍之類亦不一而足吁如公者亦可謂榮遇也已公先世潁川人系出漢太丘長寔十九傳至隋莆田兵馬使邁始家于莆曾祖福六祖明善考珪歷官文昌天長教諭皆以公貴累贈資政大夫南京兵部尚書祖妣黃氏妣鄭氏配馬氏皆累贈夫人子二男天敘以蔭補國子生天秩四女長適黃理問子曾次適戶部尚書潘公子麟餘幼在室公春秋七十天敘等十以某年月日奉柩葬文賦里瀨溪之原即公歸老

後所營壽藏也劉公又評公為人沉毅簡重淵澄山峙  
望而知為正人平居篤孝友寡言笑操履端方確乎不  
可拔既仕以清白自持雖位至六卿蕭然不異布衣時  
此公實錄予無以易也遂併誌之而系之以銘銘曰  
於惟陳公閩產之奇負其才猷奮庸于時爰自郎曹致  
位卿相

當宁倚毗搢紳嘉仰功業煒煌志行卓殊白首不渝盟  
於策書一代鼎臣如公其幾天不憖遺奄其亡矣國有  
禮典哀榮始終匪徒為公亦以勸忠維公有子蚤以門  
庇世澤之徵庶其在此



前監察御史練公墓誌銘

公諱綱字從道姓練氏蘇之長洲人高祖貞元江浙行  
樞密院都事曾祖文達海道萬戶府總管祖則成洪武  
初由春坊司直改河南道御史以直言授旌賞考哲封  
監察御史母王氏文靖公汝玉之女贈孺人公在童孺  
已有鉅人志長而嗜學通春秋宣德乙卯領鄉薦其名  
在第二會試入胄監歷事都察院正統己巳

英廟親征北虜未還

景帝監國尋即大位時京師擾攘人心洶洶廷臣雖職  
居臺諫亦未敢昌言國是公據古證今上中興要務八

條一曰謹天變二曰急先務三曰正軍法四曰布恩澤  
五曰廣言路六曰屏姦邪七曰公薦舉八曰察羣吏其  
大要謂中興與創業無異因敗為成轉禍為福惟在  
君心一轉移之間冬十月虜寇進逼京城公復上勤王  
急務謂虜勢猖獗非直要求金帛而已未必不欲效金  
人以汴宋待我也然我國家輿圖之廣倉廩之實甲兵  
之利固非宋比然求其人如神師道李綱輩亦未多見  
乞遴選武臣授以方略俟其深入乃奮擊之及勅邊將  
勒兵內向邀其歸路設有倡為和議緩於武備且請南  
遷以圖偷安者即為姦臣宜急加誅以為衆戒疏入

上感悟命施行之且奇其才可任風紀即日授公浙江  
道監察御史明年景泰改元上時政五事皆一時安攘  
之計卒未奉 璽書巡視兩淮鹽課權貴為之歛戰士  
申還朝賜宴光祿寺以示優異尋以邊境未寧虜情叵  
測上軍國大計八條皆見嘉納時吏部缺尚書

上命舉可稱任者公率同官言左都御史王翱嚴公峭  
直右副都御史年富操履端方大理寺卿薛瑄持正不  
回此三人者擇而用之庶能品藻人才追蹤王直

上於是召王翱為吏部尚書以年富為戶部而薛瑄亦  
相繼大拜三載賜 勅命有式克振勵不忝厥官之褒

先是京師有警兵多離次遣使四方召募丁壯聚之勇  
敢管歲久逋逃者衆大臣請治其罪編之尺籍公上言  
召募之初既諭以大義復許以事定遣歸故健夫勇卒  
雲集京師爭先自效旣而淹留日久恩寵未及饑寒迫  
身勢必逋避且

皇上嘗體天地好生之仁於犯大辟者尚原其死俾隸  
尺籍何至使應募無辜之民與之為伍刑賞失中莫此  
為甚方今水旱相仍流亡接踵萬一事例太重搜求太  
急致生事端為患非小兼之邊務尚殷急於用武他日  
復有召募誰其肯從

上是其言悉詔不問義勇得復於民者數千人甲戌巡按福建時官臺山民聚為盜渠魁未獲而逮繫脇從公至釋之趣師勦捕且追咎其典守者於是與衆相忤按察使楊珣乃誣撫公于朝當道亦多忌公遂左遷陝西邠州判官再徙甘州前衛經歷部符未下而公已丁外艱歸吳自是絕意功名葺復舊業于尹山之陽為終焉計建思菴于先塋之側塑先賢范文正公文信公像于中語人曰初吾自分得用於時當學范公否則為文公死爾今兩失之奉其遺像以見吾志識者憫焉公賦性剛毅不肯屈下好善之心雖切而嫉惡太甚事有不可

雖達官貴人亦面折之不為少容以故立朝未久一斥  
不復亦其勢然哉春秋七十有六以成化丁酉三月廿  
三日卒配徐氏封孺人子男四莊莘華莖孫男七元輔  
元佐元亮元齡元睦元桂元弼公初葬徐孺人于吳縣  
鳳凰山先塋亦自預為壽歲至是莊等奉柩以戊戌三  
月廿二日窆焉先期奉河南陽武訓導陳頌狀來請銘  
予與公同朝最故故序而銘之其辭曰

練在成周官有世功暨其後入代濟顯融不隕益封延  
昇於公惟公才雄武克自奮憂國奉公讜言危論爰求  
其中有源有本曷不究施卒於困頓鸞鳳伏竄鳴鵲翔

翔從古已然於今奚傷公道在人厥聲惟懿太史作銘  
垂千百世

嚴州知府邵君墓誌銘

予友文敬之喪將舉其夫人語其子天民天和曰吾聞  
之葬必有銘死者將賴以不朽今爾父葬有日爾其圖  
諸又曰吾聞爾父嘗從王思軒文游嘗稱其有文爾曷  
往求之其必無辭於是天民天和奉其母命述其父履  
歷大槩來泣告予以請銘焉文敬諱珪姓邵氏世居宜  
興永定里自宋元來已為聞家曾大父商霖大父文穆  
父昉以子貴封戶部員外郎母張氏封宜人君少蹕厲

不羣不屑治生事亦不意學弱冠遭家衰落乃絕去玩  
好折節讀書游邑庠試藝鄉闈不偶即辭親入虎丘僧  
舍閉戶誦習攻苦較淡凡三閱寒暑始歸而學有成成  
化戊子中應天鄉試己丑登進士第授戶部山西司主  
事監三河草稅時有懷白金來賂者君奮然曰吾以清  
白傳家勤苦發身乃遽從汝輩鬻私耶呼從卒將擒治  
之其人怖服求貸者久之始聽其去自是大司徒每稱  
君以勵其屬凡貨泉劇務多屬君料理丙申奉勅之  
南京督辦有程而志節逾厲戊戌陞廣西司員外郎是  
年董賦于淮之常盈倉出納之際一秉至公兵民兩受



其惠君為人儒雅貌恂恂體若不勝衣而才用特達故  
所至輒著能稱治曹務每有餘暇輒從詞林諸君子詠  
歌談辯朋盍為樂用是詩名盛一時而書法尤為士林  
所重然亦頗為當路者所忌於是薦授貴州思南知府  
時壬寅八月也思南 命下君方與客置碁客曰以君  
之才自當陟華近居臺寺要職柰何作郡縱作郡柰何  
遠去君曰古稱人生五馬貴握麟符以師帥一方茲行  
何負於我思南雖遠不猶愈於嶺南海表乎客壯其言  
奕且飲盡歡而罷歲十一月過家服金紫為親壽具觴  
豆與族里相娛悅甫三日而嚴君奄卒君大慟幾絕居

喪柴毀當是時其母年近八旬奉養不違厥志既免喪  
後猶三年侍母側與君厚善者強之起方赴選部遂改  
授浙之嚴州弘治初元閏正月至郡悉更舊政之弗利  
於民剖滯獄之積久未決不數日立辦而囹圄為空闔  
境頌出一口而君乃煦之以仁鎮之以靜而郡以無事  
凡守嚴半載而疾作君自度不起乃呼天民等立牀下  
語曰吾平生志願無不足但母老在堂弗遂終養不能  
無遺憾爾言訖泣下目微瞑天民等號啼復請言乃張  
目曰王伯大有云留有餘不盡之祿以還朝廷留有餘  
不盡之福以還子孫吾言止於此矣若等勉之卒之日

戊申九月廿二日也享年四十有八夫人龔氏武進令族由安人加封宜人三子天民娶朱氏承事郎世昌之女天和娶陸氏春坊庶子兼翰林侍讀庶伯之女天時聘杜氏鄉貢士宗學之女天民天和皆府庠生一女適太學生蹇益忠定公之裔卒之又明年十一月十九日葬所居西南蓮河原新塋君孝於親友於兄弟交朋友接姻黨和而有義至於篤志問學略章句之蕪而探索其奧旨用意文詞去藻飾之華而根柢於六經留心政化陋功名之末而挽回於治古此予所知於君而他人未必知而人知之者皆詩歌之富與書草之雄此特其

緒餘爾君初號雪鴻後作詩有半江帆影落尊前之句  
大為詞林所賞復更號為半江君平生所作詩多散佚  
天民等收拾遺藁得數百篇藏于家銘曰

有經世之才而卒掩於書有華國之文而徒名以詩年  
未屆於五旬官僅止於一麾成之而遽奪其筭達之而  
竟嗇其施此殆造物者之所忌而非人之所能為也嗚  
呼文敬其尚何悲耶

滁州判官前兵科左給事中蕭君墓誌銘

君蕭氏諱璿字子璣漳州龍谿人曾祖諱某祖諱某世  
業儒父諱某以君貴贈徵仕郎兵科給事中母陳氏封

太孺人君七歲喪父太孺人辛勤鞠育教之以學而君性最敏書過目便能成誦習舉子程文下筆輒有奇語比入邑庠益自飭勵才名奕奕起漳泉間天順己卯中鄉試優等甲申中會試廷對惓惓勸

上以誠孝仁義當道以其言涉於激抑置末第會纂修英廟實錄遣進士有文學者分行天下採摭事狀君使東廣還授兵科給事中三載書最授勅命褒顯其親援例歸省時太孺人春秋高君日侍左右不忍舍去上急於用君不俟其還陞左給事中君聞命且行而太孺人適遘疾殆甚親調湯藥扶持寢興於是益不可去

比疾已還朝則稽命已久近倖者素忌其直遂媒孽之  
出為滁州判官君曰吾以親故謫官無愧也即日戒行  
中道聞母計徑歸治喪服闋上京復判滁州時辛丑二  
月也甲辰九月十九日以疾卒于官年四十有九滁守  
周信亦閩人為君經紀後事君娶陳氏封孺人無子側  
室生二子曰紀阮出聘南京戶部尚書潘公之季女曰  
豫鄭出蓋二子皆幼君不携之官至是其從子韶來迎  
柩歸以其年月日葬某山之原始君之立朝也凡六科  
有所論列其章疏皆屬筆於君君舉大體略細故遇朝  
政得失民生利病必懇款言之期有裨益時論謂有古

諫臣之風已丑同考春闈鑒別精審所賞拔士其文詞  
多根據義理時又稱君為明有司比至滁處官事如家  
事視弊政如已疾發擿姦伏無所回撓按部者知其治  
狀雖隣境事悉以委焉江浦縣盜胥公怒而典守者自  
縊民仇於令誣令殺之獄久不決君一訊引伏和州俗  
素囂守以下咸被誣君往署州事以清慎為理比守還  
代垂髻戴白者擁車塞道曰明公何不遂留治我觀者  
嘖嘖稱嘆又謂君無愧於良民牧也蓋君為人性誠確  
不事矯飾其篤誼天至聞貧困患難赴之如不及而於  
待宗姻尤厚然剛中少容遇事不平義激發怒如雷霆

一旋踵間煦如春陽其學雖該洽而守以約有質經史  
疑義者酬答如響然重自韜晦未嘗以師道自居一時  
號賢師儒殆有所不及也惜乎年不滿下壽位不臻大  
用學不及盡傳於人人以徒貽識者之憾天之生才奄  
忽淪喪此何理也乙巳二月樞過龍江南京兵部郎中  
吳瓌其高第也為具行述以韶來謁銘銘曰  
學以窮理仕而逢時人鮮其一君兩得之時旣逢矣用  
則未旣古云全名造物所忌孰遏不達孰屯不亨不達  
不亨繫年不羸使假之年召用可必人亦有之君竟兩  
失失得相禪夜旦攸同尚有餘慶胤祚其封



南京國子學正沈君墓誌銘

君姓沈氏諱律字應和蘇州崑山人景泰庚午中應天鄉試辛未中會試乙榜授嘉善訓導天順辛巳陞昌黎教諭成化辛卯陞國子學正分教南都諸生在館下者咸知鄉方談道習義至恥言功利明年五月君疾作越三月而卒自疾至病諸生復日候館下幸君起以卒教之其卒也偃偃乎失所依歸蓋君在太學甫閱歲其善之感人已如此其在嘉善昌黎皆九載其為士所慕可知矣君始至嘉善縣吏周顯者犯法當殊死君知其寃言於令得不死太學生李鶴母死婦繼卒貧不克葬君

賻贈之俾襄事及為昌黎訓導李一薦將迎養母而乏  
資費母既老而家貧日困君集諸士子倡以義李因以  
致母居無何而李歿子幼不勝喪母益大困時君既滿  
秩尤捐貲助之使以喪還葬李得正首丘而母孫二人  
不竟至流落者君力也此又君篤於義以身為教而士  
所以向慕於君又不徒在於言語文字之間而已也君  
學膽才富存心坦夷處事寬而有制歲大比藩省交聘  
典文衡君多謝不往天順己卯成化乙酉嘗兩考福建  
河南鄉試時稱得人君殊不以屑意也其卒以壬辰八  
月廿二日春秋五十有六祖德潤考深母張氏娶陸氏

生四男子文英文奇文華文偉皆有室二女適鍾堂盛  
廣孫男二汝舟汝揖文英將奉旅櫬東歸以其年月日  
葬馬鞍山之原乃持其鄉人助教丁輓狀來請銘墓予  
雅重沈君又徵諸丁君之言可信遂為之銘銘曰  
善足以裊身道足以濟時胡官之不達而年不及耆吾  
聞之晦於今者必顯聞於後吁嗟沈君其賴此以永厥  
垂

封南京戶部主事俞君墓誌銘

君諱良字文貴姓俞氏以子經貴封承德郎南京戶部  
雲南司主事壽六十九成化癸卯十二月廿四日卒明

年甲辰正月十九日葬上元縣惟政鄉萬石墩之原經  
奉予友駕部副郎李應禎狀來請銘俞氏世家維揚考  
彥清始徙金陵隸留守衛籍母某氏三子君最少伯氏  
文顯長而有謀業廢舉以治生操其奇贏以植厥家君  
既有知即協力相之文顯於是自積居于松江而俾君  
連載入京君相時之高下徵物之賤貴以通融之以分  
售之京師賈人京師賈人常百數人立戶外以聽君一  
言為判即帖帖去無敢異議即有期無敢後歲率以為  
常一時官肆中名長標者以君為巨擘蓋君襟度磊落  
敦尚信義雖不規規於利而亦不害於致富久之文顯

歿而君亦漸老而倦於遊矣乃遺落世故家居以教子  
為事子經及兄子綸皆才敏有器識禮聘明師授以經  
術程課督責固使怠廢二子既先後中鄉舉而經遂登  
進士第授職地曹來官南都從子紳亦官武衛為百戶  
鄉人姻舊咸為君榮而君歉然無少矜衒第曰是豈兒  
子輩之能祖宗之澤也君性喜飲樂客當其少年自負  
時兩京豪俊多與之游晚雖落落如晨星間遇一二知  
己輒呼酒與飲飲輒就醉瞠目抵掌劇談雄辯氣奕奕  
猶在也君初以餉邊得冠帶三十年至是荐承封勅  
為六品京官而經已進職為員外郎又當膺五品封誥

而君不待悲夫君既感疾經徧謁醫治之弗效遂却藥  
謝醫呼經語曰吾素分已足爾能居官戒暴怒不慢人  
不要錢吾目瞑矣凡其平居教之以守身治人之法曰  
廉曰惠尤諄諄焉此經所為能舉其官著聲稱于時有  
由然也君配某氏封安人子一即經女一適神策衛指  
揮盧寬孫二曰璋曰璣銘曰

維俞有宗縣世澤君纘承之益培植貲既埒封子克迪  
奮庸于時成厥績寵命封君如子職屋潤門庭轉輝  
赫諸孫振振蕃且碩養志承顏靡朝夕公不少延吁可  
惜都邑之南祖壠側歸安其藏永無斃我作銘詩鏤玄

石後來過者期必式

楊宗廣墓誌銘

君諱浦字宗廣別號蒲軒世居武進之永勝西鄉前隍里曾祖名之祖仲文考克昌世擅高貲樂散施鄉之人多德之克昌之始承家也實藉其弟克盛克載相與戮力治產致富羨比二昆歿克載繼秉家政則又藉於君而業益殷阜久之克載又歿君於是獨綜理之田廬之開拓廩庾之充積之有加於昔又不啻數倍當是時其羣從弟多賢其子姓多秀穎而才如宗遠之持門戶宗某之課農桑宗大宗謙洎宗遠之子墳君之子增之取

科第升監學自餘司幹濟習儒文者又顛顛以起君膏  
因合食而號於衆曰吾世業不墜而加封先世尚隱而  
今加光顯此皆吾祖考積德所致吾輩不益務修德顧  
將何以迓承之以垂裕將來乎衆咨其目曰趨善避惡  
者守身之本謙已尊人者接物之常戒驕奢務勤儉者  
保家之要此外可以類推衆樂從焉蓋其家已五世同  
居食指以千百計尊卑上下罔不相孚而藹然禮義之  
風行于家表于閭里者由君教之盡其道處之當其禮  
撫馭之篤於恩義而非苟焉而已也君早失怙欲養不  
逮乃以思親名堂而事母朱氏盡孝母年七袞樂而忘



老比卒君與宗遠猶哀毀如有不及蓋孝子之欲壽其親其心固無已也景泰癸酉歲侵有詔諭民入粟者授之冠帶君於是有義官之命成化丁酉再承勸分之令發粟二千石貸貧民仍取所質券焚之至於平生推所有以濟饑寒給婚娶療疾殄助死喪者尤不貲捐橐以建景德大港錢梁三石梁與夫琳宮梵宇之興繕者尤不可數計此又其重義輕利之彰彰者吁今其已矣此鄉人所以感之不忘賢士大夫所以頌之不置也君配胡氏前禮部尚書忠安公介弟泰然翁之女三子塏娶蔣氏增胡出娶陸氏春坊諭德廉伯之女基尚幼

三女適郡庠生張世和陳彝兵部左侍郎白公之子蘇  
州衛指揮竣君年五十有四以成化丙午五月某日卒  
丁未十二月某日葬其鄉禹城先塋之次前葬宗遠戒  
增持白公所為狀來乞予銘蓋增之母於予有表兄妹  
之戚義不可辭乃為之銘曰

猗嗟楊君洵美且臧仁浹于家義孚於鄉孰無宗婣偏  
愛私藏君家五世同宇同煬孰無里閭武斷豪攘束縕  
舉火比屋是望惟古賢哲壽在名揚君年弗永其聲則  
長矧有嗣人以嚴其芳以延其慶百世其昌猗嗟楊君  
可謂不忘

處士李君墓誌銘

君關西李氏諱溫字思繹其先陝州人宋寶祐間六世祖彥祺始徙雲陽之金龜雲陽縣廢入涇陽故今為涇陽人曾祖霑生八子一為元天曆間領兵元帥其最少者曰清甫君祖考也清甫為人有闊度而急於行義嘗畜名馬價可四十金人有持布裘如緘物狀來寓者明日來假馬與之而其人返家人請發緘視所寓物清甫不可既而久不返家人竟啓視之空無所有也以白清甫置不問市井少年窺其燕居時戲作行乞聲于戶外清甫聞之亟命賑施少年哄然笑而去他日復至而

復命賑了不置疑人以此稱長者考秉中性健武克家有父風而先卒子二君其次也幼聰穎十歲喪父哭踊如成人比長力學有用世才以清甫高年母曹氏孀居不忍舍朝夕之養久之相繼卒君事兄如事父撫兄之子如己所生子而又均其愛以及於姻族之人無間也蓋君既不果仕凡素所蘊畜一推以施之鄉邑重然諾謹交際明取舍拯人之危濟人之急稱人之善皆汲汲如有不及年五十二以正統戊午二月廿一日卒其年某月日葬嵯峨山陽娶同里潘氏元季衣纓鉅族性貞靜執婦道以相君子無驕惰容時清甫久病在牀褥飲

食湯藥之供皆親之夜中數起不以為勞君既卒孺人  
屏鉛華服布素授諸子以業伯子釗司幹蠱叔鏘副之  
其仲鑑應辟才胥而以其季錦為邑庠生又諄諄告戒  
以無忝所生距君之卒三十有五年而家益饒門戶益  
光顯鑑既以年勞為順天府東馬倉大使錦登成化丙  
戌進士第擢南京福建道御史當是時孺人年向衰皓  
首矣而猶戒錦以恪恭厥職至其自處亦不失矩範凡  
有施予必先李氏而後及潘氏吁亦賢也已壽八十有  
五以成化壬辰正月某日卒計至錦衰經過予拜請曰  
先考卒時錦嘗與諸兄謀所以昭潛德者迄因循至今

不孝大矣茲將歸以明年某月日奉柩祔先考壙錦嘗辱愛於先生敢丐以銘遂不辭為之銘曰

瞻嵯峨之巍巍兮李宗鬱其相望沂涇水之源源兮李氏之澤與之為深長本積累之厚兮其發必昌矧紹述之有人兮成伉儷之良期載世而光顯兮如持左契以責所償噫謂其為偶然兮曷亦視此銘章

默菴處士楊君墓誌銘

處士楊氏諱鎮字伯重號默菴其先松江華亭人大父文昭父秉衡世有令德洪武中所親有謫戍赤水者秉衡齋裝送之卒於寓所時處士尚幼正統間始奉母莊

氏歸築室南京新河著上元縣籍處士天性明敏讀書  
能通大旨無通軒岐家學謹身飭行言動不苟雖在荒  
服已為人所愛慕莊氏武康人元萬戶明道之女性嚴  
善教處士事之孝養備至即有不樂曲為承順必得歡  
心乃已卒年八十有七求葬地久之得吉壤曰吾懼樵  
牧不禁非苟圖福利也新河之居嘗侵地於隣子弟請  
復之曰拔藩益伯古何人也卒不與較館人吳以東卒  
子景孱幼里中少年陵轢之處士力為調護教之自立  
景卒復撫教其子人高其義益處士既以儒業教授不  
豔仕進又以醫藥治療人疾已不責其報益近於古之

有道者故雖窮居里閭人多化之非偶然也晚歲貲業雖豐自奉恒儉士大夫過從一觴一詠泊如也秋官主事李宗善居相隣並嘗稱其行可師法南臺御史朱益之亦起自赤水謂與之游有麗澤之益其為人賞擊類如此配陳氏生子男三濟溥潤咸克家女一嫁句容張恪鄉貢士孫男四櫟椿桂松女四處士壽六十八以成化丙申四月廿二日卒十月二十五日祔葬上元縣崇禮鄉之原莊氏墓左益之至是已去為江西按察僉事濟等求為行述持以拜予請銘為之銘曰

嗚呼默菴有學以淵人而不以用世有術以濟人而不



以利己豈出處異途而時之不遇物我同體而餘非所計也嗚呼默菴今孰與媿求之古人庶幾其無愧也

檜莊王君墓誌銘

君王姓俊其諱懷英其字檜莊其別號也其先本淮陰人洪武中有諱禮者仕為羽林左衛經歷卒留家京師羽林生遇才遇才生大用大用二子長懷聰君其仲也母陳氏卒時君纔免襁褓纍然衣衰衣從其兄行喪擗踊哭泣如成人久之事繼母童如其所生大用喜曰事親從兄人道之大爾能知之他非所慮也遂舉家政授焉君自是服勤幹蠱凡事必稟命於親協謀於兄而後

行不謂利可求而忘義以趨不謂私可懷而背公以圖  
不偏駁以愛自矜不沽穰以事自營而生業無不理儲  
侍無不備養生送死與夫姻族慶吊之需無不給顧為  
之有道無玩好之供服食之費居常衣布蔬食僅取足  
而已大用卒君居喪如喪母益哀而禮益充蓋前甫有  
知今其家既裕君子又謂之知禮君所居都城西南新  
河之澚其地濱江為宦遊商舶所湊集之境故君所接  
識為多然無不交以道而要於信故人亦樂與游而喜  
為延譽焉君居有大檜二本挺然秀拔人以儼其伯仲  
名其堂曰雙檜而君遂取以為號君卒以成化七年十

月戊子年六十娶李氏先卒繼須氏鄧氏生一男二女  
男曰輔為府學生學成而夭君遂無嗣懷聰以子相為  
後至是奉中書舍人羅麟狀來乞銘將以是年十一月  
甲寅葬江寧縣光澤鄉祖塋之次銘曰

為子克孝為弟克友惟茲秉彝疇曰予究人定勝天為  
善必祐胡天難諶俾君無後何以勸善於古則有嗟嗟  
王君於今奚咎光澤之原山明水秀太史琢辭垂示不  
朽

處士胡君墓誌銘

金陵胡生豫遊學京師既逾年而其父尚德處士卒計

聞南歸以其師翰林編修汪伯諧所寓簡謁予請銘處  
士諱博字以文尚德其號也賦性謹厚少從金尚素先  
生學記誦窮晝夜不輟稍暇臨古人書咄咄逼真同遊  
者莫之或先當道有知其善書者薦之以養親辭母姚  
氏卒父孟章已老養之曲盡孝道夜常卧寢榻旁候興  
息父性好客客至必具酒殽必豐腴惟父之為適不計  
其家有無也處同氣友愛尤篤弟曰約曰節曰操亦賢  
與相孚家庭翕然無忿爭疾詬聲女弟嘗納里人沈璣  
聘璣侍父遠役慮其過時携奩具抵其所嫁之其一嫁  
王鼎者夫死門戶衰落復迎育于家曰世之女婦知餓

思軒集卷廿八  
死事小者幾人鄉人聞而賢之謂為父兄不奪其志可  
矣而顧能全其節其有警於頽俗豈小補哉天順八年  
朝廷下優老之詔孟章時年九十餘受冠帶遂大書榮  
壽扁堂中求一時名人歌詠之以侈

上賜而隆親福平居足不踐非禮之地惟祖墓歲久當  
修葺者則時往督工買田給守墓者謹封樹使無侵盜  
之患娶伊氏先卒繼娶顧氏生二子長觀次即豫二女  
適祝誠嚴恂孫男二洪澍女五壽六十九以成化二年  
十一月卒卯卒明年三月癸酉祔葬城南鳳西鄉汪家  
莊先塋其先長洲人曾祖均序季均亮嘗知丹陽縣祖

汝器洪武中徙居金陵故今為上元人銘曰  
其學也情者可立其行也薄者可敦樂此終身奚資顯  
聞維古名宗克昌厥裔咨爾後人引之勿替

思軒文集卷之十八

思軒文集卷之十九

墓誌銘

通議大夫太常寺卿兼翰林院侍讀學士贈禮部  
左侍郎王公墓誌銘

公姓王氏諱獻字惟臣號退菴杭州仁和人也曾祖諱  
思誠元醫學提領祖諱性安冠帶醫士贈太常寺卿兼  
翰林院侍讀學士祖妣楊氏贈泚人考諱智初封編修  
後累贈太常寺卿兼翰林院侍讀學士妣顧氏亦累贈  
泚人繼母俞氏封太淑人公天賦穎異羈貫知讀書記  
誦日數百言不煩熟復即終身不忘十五學通經肆筆



作舉子程文十七領鄉書明年景泰辛未登進士第與  
狀元柯潛等二十八人同進學東閣賜居第給大官酒  
饌及膏紙費命內閣大臣典領之蓋不別立師不出  
就外署一如永樂初科故事公感際遇益肆力於學工  
古文詞在同年中最號敏贍時公猶未娶吏部侍郎淳  
安項公見而竒之以女妻焉癸酉授編修與修宸宇通  
志陞修撰天順初乞歸省賜路費鈔逾年還

朝命入內館授中貴人書癸未春同考會試會貢院火  
秋復試復為同考是科先後兩入簾不改命者惟公一  
人丙戌修撰秩且滿先公計至即日 陞辭星行抵家

治喪葬戚易兩至暇日與鄉人接恂恂謹厚無一毫早  
達貴侈之態人以為難尋用薦起復之公疏乞終制服  
闕陞左春坊左諭德兼修譔庚寅命充經筵日講官  
賜大紅金織羅衣束帶冠履辛卯再賜大紅羅衣一襲  
是秋主考順天鄉試壬辰充廷試讀卷官賜寶鏐千緡  
未幾陞翰林學士癸巳賜金帶本朝學士非典密務  
侍日講者皆不與是賜蓋異數也乙未復充廷試讀卷  
官賜寶鏐千緡丁酉朝廷用儒臣議追崇

先聖禮樂遣公祭告闕里比還適兩嘗與修宋元通鑑  
成陞詹事府少詹事仍兼學士戊戌皇太子出閣

命侍講讀于文華殿又命偕學士南昌謝公教庶吉士  
梁儲等于玉堂外署滿三載乞恩移封父母

詔許之今制凡朝臣五品已封者即四品不封先公既  
贈諭德今加贈詹事皆兼兩銜妣亦由宜人加恭人入  
亦罕與為嬪辛丑主考會試壬寅修文華大訓成陞  
今官甲辰丁未再充廷試讀卷官復再賜寶鈔蓋自擢  
第入翰林于今三十有七年先後握院章者十有六年  
而年已五十餘後進推公為先達知己期公於大用公  
雖謙不自居而亦頗自信其必至然訖不登樞筦履要  
劇以少展其所抱負君子惜之所謂行止非人所能為

而天實為之也公為人性度夷坦襟宇澄霽與人交洞見底裏為人謀不擇利害嘗有同官最厚者卒而子幼家事為二弟所持公忿然不平乃拉二三僚友為之處分弟不得逞遂造為無根之謗以誣公好事者從而扇之公雖弗為辯而亦不能釋然于懷卒之以此齟齬終身而不克永年於是識者又深惜之謂人衆勝天而不可盡諉之命也公學通春秋三傳作詩文有奇氣好持論而切於用事作字亦飄逸類其為人客至對奕終日其所自奉雖儉而供具必豐比遭謗則罕與人接遇親舊亦寡言初拜官時年方少而癯眇中歲漸豐腴比年

乃更羸然如不勝衣蓋時已屬疾猶日侍朝供職相知者纔一再晨不見而公已易簀矣成化丁未四月八日也享年五十有四計聞

上憫惜之贈禮部左侍郎遣官諭祭命有司營葬歿後三月兄惟貴自鄉邑來歸其喪以某年月日葬某山某原因念公之子霆久廢於癰疾慮無以紹其嗣乃請於朝以其仲子雲後公制可之併以雲為國子生俾之有世祿焉吁哀卹之典厚矣公配項氏贈淑人先十二年卒生男一即霆女三長適翰林院編修江瀾次適商順次未行繼劉氏亦卒側室生女三皆幼予曩在景泰初

與公同年及第同讀中秘書又同官翰林同居一坊交  
相契而還往甚款密一日公與童庶子大章過予大章  
好謔浪喜說相談死生之理自謂其體太魁碩當不壽  
公亦清脩不耐老吾二人先死銘皆於子是屬蓋予僅  
長大章一歲死先後未可知若公則少予十稔我銘當  
以屬公皆笑而頷之後予去官南京二十年不返大章  
卒予不及銘惜其有三大節如不附石總兵求官至挽  
之不去解紛一朝士廷辱石氏之黨

上怒索其人而大章不妄指以逭己責當時稱之而後  
世無傳焉予深有負於大章也頃予被召北來而公

東坡先生集卷十九  
四  
歿甫十日謂可圖踐言於公而公家不予知遂不嫌自  
售請於編修君得其所為述事狀為按而序之蓋千載  
之傳雖不宜託之蕪陋譎淺之詞而片言之諾庶足以  
全夫朋友死生之義故不復他恤而卒為之銘銘曰  
仕既逢時位亦不庠直驚橫馳靡適不宜胡嗇其施而  
止於斯尚永於垂刻此銘詩

通政使司左通政徐公墓誌銘

公姓徐氏諱世英字國用常州江陰人高祖子敬曾祖  
彥能皆累贈資政大夫兵部尚書高祖妣戴曾祖妣王  
皆累贈夫人祖晞累官兵部尚書嘗出贊甘涼軍務督

饋餉于雲麓皆茂著勞績祖妣胡封夫人考訥舉賢良  
承固安縣歷陞後軍都督府都事尚寶司丞致仕以公  
貴封通政使司叅議妣羅氏封恭人公生而厚重幼不  
好弄數歲知讀書無膏粱紈綺之習正統中以能書薦  
授中書舍人天順初兵部奏舉提督武臣貼黃滿九載  
陞通政使司右叅議未幾調南京通政司再滿九載陞  
右通政成化庚子轉左加食祿視正三品弘治己酉奉  
旨致仕蓋公自己巳釋褐數歷兩京閱四十年勤勞蚤  
夜小心翼翼無纖毫過舉每退自公輒繙閱經史吟諷  
詩詞舉筆作真行草書翛然終日蓋雖累世貴顯家高



貲而自奉澹泊紛華侈靡之物一無所好獨好法書名畫與夫器物之樸古者故所蓄甚富遇真贗亦輒能辨識平居寡與物接雖重客至亦未嘗授館致餼比休致歸益謝絕人事于所居大司馬坊之第效古人作綠野堂其西為藏書畫所日憇其間以自娛悅予頃作文贈公謂公之歸宜與鄉人飲酒相歡携童冠窮山水之樂而公不能從蓋簡重質直不能與人狎比固其性然也若夫謹祠祀睦姻黨推所有以周人之急折券棄責以貸人之乏其行誼卓卓又自有不可及者公配朱氏封宜人光祿寺丞璽之女戚里安國孫公忠之外孫女也

子男二槃側出娶李氏羽林衛指揮雄之女槃朱出娶  
黃氏錦衣衛指揮賓之女女一適虎賁左衛指揮房鉉  
公壽六十有六以弘治庚戌八月十四日卒是歲十二  
月十三日葬綺山先塋前葬槃祭持其鄉入前進士張  
昞狀來請銘納諸幽堂與先尚書府君嘗與兵部公遊  
最稔而予辱交公父子間亦克修世好於公之銘義不  
可辭乃為之銘曰

先皇在御軫念留都凡百有位惟賢是須公于其時賢  
孰與比矧於其先守官之嗣銀臺三紀資序屢遷邁烈  
揚休有光於前維漢楊袁世濟厥美自瑀逮邁與唐終

始時有先後人無古今徐顯于明遠紹徽音疇篤於承  
尚在爾後世德是修世學是悉是維世臣子衍孫蕃與  
國咸休於千百年

工部主事致仕宋君墓誌銘

君姓宋氏諱瑛字克輝松江華亭人高祖子潤曾祖雲  
卿祖季文父頤母某氏五子君行第四為兒時已有異  
稟稍長知向學笈書出居于外誦讀不輟日食惟饘粥  
水葺人不能堪而君處之裕如尋奉父命走京師從吉  
水李庸脩授經景泰庚午中應天鄉試天順丁丑中會  
試廷試第二甲第一人授工部營繕主事掌繕工司事

典徒役與權貴雜處君首絕干請次屏豪猾之撓政者  
徐求弊端所在而抉剔其冗濫於是人憚其嚴而樂其  
簡易而權貴者遂多不便思中傷之陰使人詐為傭人  
以伺察其過歲餘卒無過乃更得廉謹數事反敬禮焉  
後傭者具以語人曰吾不忍公之善泯沒於世也三載  
考績給勅命贈父如其官封母為太安人既而聞諸昆  
弟分財異居太安人往來就養即日乞歸省留妻子家  
居奉母而獨赴朝且圖終養會禮部聘同考會試疏不  
果上時天順癸未秋也明年

憲宗皇帝登極詔許五品以下官自陳致仕君即抗疏

解官歸日侍太安人左右問安視膳孝養備至及卒居喪毀瘠有燕乳白雛之祥其伯兄嘗嬰疾君侍湯藥如侍親平居篤友愛於諸昆弟終始無替然性厭塵俗嘗于所居之西闢地數畝環植以竹鑿池引泉壘石為山池上作亭扁曰三壺秋碧日憇其間有若翛然於物外者及觀其治家有法內外二百指肅如公府三族子弟有願學者悉館穀而造就之幼孤不能自存者周恤靡所不至初解官時年方四十有五與諸兄謀合族做洛中故事作延齡會會即談古賢人君子嘉言善行以相風勸且各賦一詩以紀其事舊第為族人所墟君每過

之輒泣然曰吾祖宗世業也卒以已地易之地有故井  
與榆木一章乃謀建本原堂以示不忘堂成有日而君  
即世矣君初號古直更號檜雪晚年別號中溪懶人所  
著有中溪集靜中錄綱目鉤玄源流至論節要諸書藏  
于家初娶王氏贈安人繼朱氏封安人子四男諤有癘  
疾詔郡庠生譔註三女適鴻臚寺署丞俞順董御史子  
懷李布政子樂諤與俞氏婦王出餘朱出也孫二男公  
遇公選君卒以弘治元年八月十六日春秋六十有九  
明年己酉某月日葬某山某原從先人兆前期詔持平  
湖過副使璘所為狀來乞銘予嘗與君同朝雅知其為

人而憲副又與連姻其知之尤詳顧善多可錄而石不容書姑最其表表者而論謨之而系之以銘銘曰

學精於進仕恬於退曷不顯融德義可貴維孝維友政施於家孰公孰卿大行何加涵養既深操履彌慎靜中有錄奚悔奚吝歸而求之士有師承儀而則之鄉有典刑典刑猶存室邇人遠後有來者亦克用勸矧爾嗣人允文而臧俾熾而昌君乎不亡

陝西略陽知縣徐公墓誌銘

公徐氏諱延字貴昇先世淮人趙宋時有諱克正者明經及第後以母老不仕卒謚節孝李克忠滁州同知再

傳而至李明始徙居晉陵李明生燁德祐間元兵屠城  
居民有伏積屍中得脫者七人燁其一也仕至常州路  
織染局提領公高祖也曾祖養源祖漢考幹字彥貞洪  
武間舉人材拜大理寺丞與都御史詹徽論事不合免  
歸後起知寧海州娶金氏蔡氏曾氏生四子公其季也  
曾出六歲失怙母撫育之教之讀書遣遊邑庠時先公  
兵部府君方為予姊擇配蓋居與公相隣知其賢遂以  
妻焉公屢遊場屋不偶而家益貧學益勵養母極甘旨  
實予姊有以相之正統辛酉中應天鄉試壬戌會試授  
充之城武教諭城武乏科目士公至教以經學督勸



以時自是登鄉榜者累科不絕秩滿用工部尚書王公  
復薦陞鄆城知縣鄆多屯堡有集場當市易日軍禦於  
民至橫不可制公設邏卒數十輩遇橫者輒擒置之法  
膏械繫大辟囚詣憲司而中途亡去護送數人當連坐  
公禱之城隍其人自詣獄曰若有所繫不容去人咸以  
為異三載丁內艱服除調漢中略陽縣其地屬隴右尤  
險遠民頑獷不易治公簡其條教帥以代理建廟學增  
弟子員先是春秋二丁行釋菜禮公易以釋奠暇日出  
舍于郊課農桑申禮讓民翕然化之又三載竟謝事歸  
時成化己丑公年甫六十併謝家事日居城南之別墅

曳杖逍遙隴畝間客至必豐設盡歡遇真率會則赴不待召當是時公精力尚強飲量故豪引滿舉白酣歌劇談意豁如也其平生勇於行義於恤族尤厚蓋自為校官已收養族孫之貧者四人曰敦敏政敦皆畢婚娶教使成立敦早卒嫁其孤女二人婦許孀居二十年養之終身族人負官錢者脫室入簪珥代之輸將鬻產以辦軍裝者亟捐橐助之至於質敏顧學而資用不給周之尤不計其費於是其族之人無失所無廢業學皆決科而仕有成績鄉人士益多公行誼云公配王氏即予姊柔貞順表著閨閭先公十二年卒生二子瑞太學

生娶段氏福建叅政伯誠之女繼郭氏濟川衛指揮某  
之女瑛義官娶劉氏二女長未出適次適國子生溧水  
李茂皆先卒側室張氏王氏生二子塘娶俞氏縣令汝  
舟之女瓏二女縣學生朱文繼府學生陸麒其壻也孫  
男五淑滂潛淵涇女七曾孫男一公壽七十有四成化  
癸卯九月十五日卒乙巳歲除前一日葬懷德南鄉陳  
霍墅之原前葬瑞等奉予友朱急易狀泣拜請銘蓋予  
與公皆世宦家有衣冠之舊比公之倩予家也有姻婭  
之好故予知公誠深而瑞諸甥之望予誠厚於其請義  
不可辭為序而銘之銘曰

生人之理曰政與教孰覃其施以臻於效巍巍徐公道  
以教行俗以政成有欲厥聲成德達材更化善治際時  
方亨公致其事田園未蕪松菊猶存歸斯樂斯有琴有  
樽有賢子孫日侍左右優游怡愉卒登遐者壽富考終  
五福具全公顧何求人猶歎焉曷不百齡曷不三事歛  
其餘庥以庇胤嗣胤繩繩益熾而昌詩禮簪纓儀于  
鄉邦斲石薦辭陳之幽隧休庸顯問流之久載

河南孟縣教諭致仕李君墓誌銘

君姓李氏諱忠字思誠號石齋晚號半溪道人其先本  
洮州人系出唐西平忠武王晟五代時有諱元瑛者從

王審知入閩今為福之侯官人曾祖仲安祖伯大父彥  
暉累世業儒君幼服庭訓性敏喜學比入郡膠而學益  
進正統戊午鄉試以三禮魁多士景泰辛未會試授廣  
東廉州府學訓導秩滿陞河南孟縣教諭其始至廉也  
其地瀕海士怠於學君嚴督之隨才質以施教因問難  
以解惑學徒誦誦咸趨有成賓興論秀累科不乏懷孟  
雖近地士尤不務學君至加誘掖焉蓋不徒邑士知所  
嚮慕雖隣邑士亦間有從游者至是秩再滿諸生懇留  
卒業而君力求謝事時年五十有七君為人儀觀秀偉  
襟宇和粹與人交不立涯岸平居以澹泊自將而事親

盡孝奉養周至兄思謙為仇家所構謫戍延安事嫂如  
母撫姪如子久之兄以宥還聚處如初而姪乃求析爨  
且利多貲君曰人生不幸無兄弟有之而或緣財產成  
乖戾甚可慨也遂恣所取弟思勉蚤世遺一女長育之  
為擇良配弟婦賴以完節子塤生有敏質君篤教之遂  
中鄉舉授寧國府推官而君誨諭諄諄嘗曰仕州郡者  
惟寡嗜慾能廉廉則風節自立然承上必恭謹接下必  
慈良顧世未嘗無廉吏率不得於上下盖自足以罔人  
也汝宜勉之又曰汝為理官當明慎用罰獄苟有疑宜  
傳輕典無辜逮繫者必縱遣之吾見刑官類深故而冒

禁者多此又厲人以自免也汝宜戒之塤於是謹受教  
旌郡未幾有賢稱焉君娶王氏子四男長即塤次堂均  
孟子三女孫男七侃郡庠生儼儉俸价僕俛曾孫男二  
良金良璧君壽六十九以成化甲辰四月十三日卒塤  
聞計星行過金陵乃具事狀衰經拜予請銘將歸以某  
年月日葬君于城北奇山之原銘曰

李自五季有家于閩繼世有德亦有儒文石齋顒顒爰  
發其秘一舉擢科榮躋于仕于廉于孟善教克施士知  
嚮方吾其歸歟出處去就君子大節矧曰有子能承其  
業小試郡里名聲彰聞要於有成誨言諄諄優游園田

歸逾一紀壽殆七旬溘焉長逝奇山之陽有封若堂太史作銘為詔不亡

福州知府致仕吳君墓誌銘

君諱淵字本深姓吳氏常州武進人曾大考成五大考  
彥忠考昌由胄監生解褐知福建沙縣移浙江天台縣  
沙縣未經寇掠時最號完富仕者指為利園天台稱文  
獻而民好訟有司多畏其據拾公去沙囊無一錢在天  
台滿九載不挂吏議用最陞河南歸德州同知居三載  
謝事民遮道留至馬不能前娶蔣氏再娶彭氏生子七  
人君次二彭出也少侍父宦遊從師講學通壁經能為



舉業文章一日歸自台著錄泮宮學老生多易視之曰  
是小子未必有文特孟浪爾未幾試憲臺入格曰安知  
非偶然也景泰癸酉中應天鄉試衆始駭愕願與交天  
順改元中會試登進士第交者益衆加敬禮焉而君殊  
不以屑意踰年授刑部主事聞歸德喪竭力治葬絲髮  
費不以干諸昆弟曰先人產薄諸兄弟固空無貲吾猶  
有薄祿可營辦也鄉人稱之終制復任明慎用刑獄絃  
君訊決者人無反異考績給勅命進階贈歸德如其  
官母彭封太安人妻張封安人尋陞知福州府福大郡  
在會府下君初至獄繫囚餘五百人貧民逋賦亦不下

數萬計君日坐堂上閱成案既得其情然後出繫囚錄  
無冤濫者即配決有誣者立破械縱遣之不淹旬徃狂  
為空常嘆曰吾固知催科無善政然急之則殘民緩之  
則損上斯二者皆非也於是從容勸諭取償於給足之  
家多方籌畫裁省其浮浪之費蓋民不重擾公有贏積  
以數十年宿負而一旦釋之豈徒民戴其德士頌其賢  
雖藩司憲臬亦無不嘉其能而樂其久任然君獨以彭  
老在堂烏鳥之情不能自己乃以成化己丑春乞歸致  
仕歸二十年為弘治戊申七月十日卒于家春秋六十  
有三子四男三女男璘娶謝氏蚤卒琦娶張氏瑋娶陸

氏女適福建叅議同邑孔宗顯子肅皆張安人出男珙娶潘氏女許聘范某者出側室杜氏聘鄭清裕者側室高氏出也孫五男鎮銘欽鶚鏃君為人易直無涯岸見人怡然諧笑若無忤者至與較曲直商度人賢否論議侃然人或非賢雖達官要人不少假借直苟在我遇郡邑大夫亦無所遜避宋廣平嘗言叔向有遺直子產有遺愛兼之者其魏公乎識者亦以是擬君君卒後二年十二月一日琦等舉柩葬懷德北鄉西倉堰之原乃預持其姻武定知州鄭公實狀來請銘銘曰方壯而仕未衰而止優游暮齒亦多受祉銘以永藏於

千百祀

贈南京大理評事楊君墓誌銘

君諱衡字克平姓楊氏湖廣邵陽人祖原旺父偉洪武中舉茂才為雲南臨安府寧州同知母朱氏君自少喜讀書長益好學正統壬戌由鄉校生貢春官為太學生時居太學者積廿餘稔始登仕籍多迫衰謝君嘆曰仕以行吾志血氣衰烏乎能行遂援近例授職高郵州吏目既至問民疾苦事苟有利於民諄諄焉為守言之期於必行不必自己出也政或未平訟或失其情抱成案與守相可否必至當乃已忘其身之卑也景泰甲戌歲

旱蝗勞心早夜思為民弭災御史鄭寬按郡知其賢俾  
專理荒政是歲民賴以不饑君性度寬簡與人交極和  
易而自處不少縱逸丙子某月日卒于官年五十有四  
某月日葬余湖山白馬田之原配孺人張氏諱淑靜前  
山東道御史霖之女毓質明秀執婦道以相君內治君  
歿教其子如君存日天順庚辰廷芳遂舉進士癸未授  
南京大理評事會

今上登極貤恩贈君如子官職封孺人為太孺人丙戌  
十月某日太孺人卒年六十四子男二長即廷芳次廷  
秀女一孫男四英怡悅忱廷芳卜以某年月日合葬先

公之死謂葬必有銘所以述功行垂久遠乃持其鄉人林璧御史狀來請於予嗚呼楊君人患不立志爾苟有志為民職無小時無難就吾力之所及民皆可以受惠不然雖致位通顯祇自取愜適爾於時奚益哉如楊君者誠不可使無銘其辭曰

有繫其逢計班資之庠崇有佚其通曷於時之閔凶吁嗟楊君維志之求靡欲之從孺人相之以令厥終以永閔斯封

存仁姚先生墓誌銘

姚先生諱侃字文剛吳人居京師以醫術鳴京師之人

有疾之他醫不能愈或愈而不能報者皆之先生先生  
皆應之不辭而報不報不計也先生之初業醫也厥考  
樗菴嘗誨之曰醫仁術也惟存心仁厚者能為之因佩  
服焉以存仁自號先生業帶下醫其目為產科其實於  
書無不讀於其道無不通而執其術未嘗遷有貴公子  
持百金求一七齋不與曰吾非專科也產科其為疾最  
危而先生治之皆有奇效有濱於危而即安者有絕而  
復蘇者人德之皆不惜重報而先生辭受皆有義或強  
之曰吾非藉是以罔利也又非獨於醫也閭里中有喪  
不能舉婚嫁不能畢與顛連無告者皆隨力賑施之而

尤重赴人之急隣有被回祿者其稚子幾不免先生躍入火中挾出之或問之曰是猶見孺子入井當是時吾知哀其窮而已他不暇計也母陸氏蚤卒每語及泣下潸然母黨有居吳者每招致之曰見之猶見吾母也與人交無小大貴賤一以誠至於遊公卿之間亦無少屈下君子曰姚先生有道者也使廣其售不限於一科多其獲不問義之可否秘其有不輕以施予人皆不害為致富而戾是焉其平生僅僅取足非有道者不能也先生有子五人其長曰曷次曰旻皆業儒昇業醫昆杲雖幼亦秀穎曷中乙未進士今制士登第為進士者郡大



夫為建坊于其第以表異之曷坊成有日執藝者弗戒於火殃及比隣數十家先數月墜馬幾斃其繼母石氏年八十餘驚悸成疾卒先生既毀傷其遺體又痛悼其母至是又閔其隣之貽累遂遵疾以成化丁酉歲除前一日卒士大夫爭往吊且嘆曰姚先生施仁術以利濟人其所存如此故天為報之篤生賢子登庸于時永介壽祺終享祿養固其宜也而遽止於是此造物者之不可致詰而為善者之所以有怠廢也姚氏其先吳人曾祖諱均達祖諱繼之洪武中徙京師占籍上元縣考諱中號樗菴有行誼二妣皆賢淑配金氏繼徐氏曷聞計

南歸奉其姻兵部主事沈鎰狀來請葬銘其葬以戊戌  
某月日其墓在江寧縣安德鄉英山莊之原銘曰  
先生有術攻軒岐先生有道窺姚虞嗣續之賢慶所遺  
吁嗟百世名永垂

處士張君墓誌銘

南京刑部副郎張述古之兄明古卒葬有日述古持其  
同官談主事綱狀來屬銘予於述古同郡同遊兩京交  
相厚雅熟其諸昆行誼銘所宜為明古字誠之世家宜  
興金紫圩蓋其先有諱磐者仕宋為金紫光祿大夫地  
因得名自是八傳至君曾大父伯英雖時有顯晦而世

守一德大父永德父元凱號似醉翁益以培植又再世  
不顯至述古而始發焉先是翁因課述古學以語君曰  
爾其以善承吾家若席寵門緒則以付爾弟君佩服嚴  
訓飭躬勵行不少怠弛翁嘗苦戶役繁重家步衰弱然  
賴君相之訖於不墜正統間君代翁典鄉賦征輸漕輓  
舉無廢事邑大夫賢之謂翁有子翁卒居喪盡禮於世  
俗所尚繁文悉屏不用曰祇以犯分非所以事親也當  
是時其祖母楊母儲皆在堂君孝養二母得其歡心久  
之楊氏卒君治喪尤有節述古先為行人銜命往來道  
鄉邑君情愛翕合比其去必勉以盡職毋以家累為念

其言蓋諄諄也君雅志高諒不妄與人交其所以游必  
忠信有恒之士治家有法處鄉黨恭而有禮事上接下  
一以誠意未嘗藉聲勢以為人患苦訓子姓必以詩書  
先娶篁里李氏武進鉅族生三子邦冕邦旒邑庠生邦  
黼一女許聘任瑞子某繼娶溧陽狄氏生男一邦黻女  
一尚幼君年五十以成化癸巳五月一日卒其年十二  
月十九日葬宋安丘先塋之次銘曰

允義張君多聞內植維志之求以承先德季也烈烈登  
庸于時溥暢周流維德之施譬彼鄧林疇非名木或斷  
或蕃同生異族君雖不顯厥聞乃光年雖不永其存者

長我作銘詩以詔其子欲纂其承庶其在此

牧洲居士張公墓誌銘

牧洲居士張公以正統丙寅正月十三日卒成化甲午其孫同始乞予銘墓將追納之時同為南京刑部員外郎謂失今不圖恐遂湮沒為按其姻經歷尹灝狀序而銘之居士諱子建字浩然一字循素其先清河世家有諱德廣者仕後唐為清遠軍節度推員外郎封開國男上柱國監永新鎮因占籍為永新人歷十五傳至諱義山居邑南鄉之大塘義山生友箴徙居黃陂友箴生應賢居士父也居士生十二齡而父歿母劉憐其孱弱遣

從黃冠師游而仍業儒學成乃歸治先業而增拓之娶  
李孺人克勤內相家用豐裕所居東環二水水中有洲  
雜植柽柳春夏之交綠陰蔽虧禽鳥和鳴牛羊群牧于  
洲渚之上居士方與一二知己臨清流坐白石賦詩酌  
酒悠然自適此牧洲之所為號也邑有清源真君祠故  
老相傳其神以六月廿四日其使者以八月十六日誕  
生居士歲以是日潔牲醴集里中少長為賽神之會賽  
畢飲酒為樂曰吾固知淫祀非禮第藉此以敘情話爾  
其於祀社亦然其平生襟度灑落翛然物外真若無嬰  
於世故者至於見義勇為臨財不苟睦宗和族篤近舉

遠確乎禮法之士季弟溺死哀其非命撫育其子汝畔  
為畢婚娶久而無子復為之娶比生二子喜曰吾弟有  
孫可無憾矣宗姍踈戚婚喪之給皆有常數有以凍餒  
告者解衣推食惟恐不及死無所歸率衆為具棺斂而  
親為擇地以葬宣德甲寅歲歉鄰邑問糴者踵至豪宗  
鉅室或鼓高價或閉不發居士盡出所儲平價糴之至  
具酒食為留數日里有蔭注二陂每歲倡受水者併力  
修築動以百人日炊粟一石為殮畢事乃已此皆居士  
素履落落可稱道者其未可悉數者尚多大率尊德樂  
義篤倫理重恩義有古人風度鄉先達劉石潭嘗評之

曰其始慕無為若留侯之遇黃石終思至道若橫渠之  
變伊川識者以為知言居士卒時年八十寔之日執紼  
者千人李孺人年七十有九以景泰丙子七月某日卒  
與居士合葬義山府君墓左二子長汝翼娶龍氏次汝  
諧石潭季女壻也三女曾從矩尹期吳允仁其壻也孫  
男六人長即同次周因固圉困女九人曾孫男七人女  
六人同由天順庚辰進士擢任秋曹由主事至今官清  
修簡重為時所稱居士之貽謀遠矣銘曰

張出清河支蕃派演其遷永新實自清遠維清遠裔奕  
世多賢孰其承之是曰浩然早慕玄機晚歸正道石潭



有評古今同調居鄉允義恤族孔仁令德之報在其後  
人起家儒科顯顯在列尚有寵恩用光祖烈

陳處士墓誌銘

天順甲申夏予友秋官郎中陳廷儀將移疾歸閩乃持  
王彥弼郎中所為其兄述事狀詣予曰鴻漸少多疾早  
衰比違吾父母來京師日繫於思然猶黽勉供職業者  
以吾兄廷泰在能力於養也今不幸死矣吾每傷吾兄  
以重念吾親輒隕心疾首吾是以乞歸且將視吾兄入  
此土也子知我者幸不鄙而賜之銘廷泰諱宇清廷泰  
其字也先世光州人其鼻祖房國公翽唐季從王審知

入閩遂家福唐四傳而至檢覆使懷粲始徙連江今為  
連江鉅族曾祖宗成祖著父文亮以廷儀貴累封奉政  
大夫刑部廣東司郎中母林氏封宜人君生有至性髫  
髻時刑部嘗以公務至都下大母賴孀居孝養備至里  
有疫死者大母亦染疾幾殆君視湯藥彌謹禱于神願  
以身代母疾遂愈比長而益更事刑部俾代秉家政凡  
所酬接無不悉當於理而事須稟命而行者亦無不當  
於親心始廷儀為鄉校生君策勵之景泰辛未第進士  
奉使南粵君適來視弟遂與偕行歸覲奉引家庭中和  
氣藹如也自是廷儀由主事以至今官日躋貴顯君每

竊戒盈滿足跡不至公府族姻閭黨待之不失恩義隣  
有以舍旁地求售者君憐其貧倍償之直久之將結廬  
奉親而彼復爭之不得遂肆兇以挺格君至斃壬午十  
二月廿六日也嗚呼傷哉君豐儀偉貌讀書工詞翰平  
居言不出口至論古今事是非成敗則辯博不可窮詰  
鄉長者多愛重焉娶張氏生四子謙光游邑庠積香稿  
春秋四十明年十二月某日葬廩胡山祖塋之側君卒  
未幾何彼兇亦繫獄死是固天於橫厲者已降割不少  
貸矣而人之於君猶悼惜之不置豈以其平生植德累  
行而不得正命以終為非作善者之報耶銘曰

委若荃兮胡藉蕭以肴烝偃翔鸞兮曷棄鷖以上征噫  
孰夷其生兮孰契其萌此殆不可致詰兮吾將順乎委  
形

思軒文集卷之十九